

13 DEO OPTIMO MAX. 4.

UNI ET TRINO,

VIRGINI DEI - PARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS
*manè discutienda in Scholis Medicorum, die Jovis decimo-tertio mensis
Februarii, anno Domini M. DCC. LV.*

M. GASPARDO COCHON DUPUY, Regis Consiliario, &
in Arce Maritimâ Rupifortensi, Anatomes & Chirurgiæ Professore
Regio, Doctore Medico, Præside.

An Diversis Temperamentis diversus rerum non naturalium usus?

I.



ER ubique circumfusus non paucas alterationes à cœlo, anni tempestate, solo, mari, paludibus, fluminibus, meteoris, exhalationibus mutatur. Hinc æstivus, frigidus, gravis, siccus, levis, humidus & inquinatus evadit, pro ut una aut altera ex causis eum immutantibus operatur. Obnoxium tot vicissitudinibus fluidum illud necessariò corpora ambiens, eadem multifariam afficit. Edulia ex cerealibus, oleribus, leguminibus, avium familiâ, quadrupedum grege, piscibus maritimis, fluviatilibus, paludosis deprompta, variis condimentis resecta, variâ arte parata apponuntur; ex his quædam digestionis vires faciliè patiuntur & nutritionis munia liberaliter adimpleant, dum quædam organis & succis digestivis reluctantia, operosius fluidis & solidis assimilantur; alia liquorum consistentiam adaugent & vasorum texturam rescillant, alia fluidorum motum & solidorum elaterem intendunt, alia humorum moleculas tenuiores & vasa obsequiosiora conciliant. Aquæ pondere, munditie, miasmaribus heterogeneis in suo sinu reconditis inter se dispares, succi ex uvis & fructibus expressi, cerevisiæ, liquores ardentes potulentorum fundunt latices eò dissimiliores in corporibus præstitutos effectus, quò dissimilioribus scatent dotibus. Vigilâ & motu tenduntur solida, atteruntur, tumultuariè agitantur fluida, horum pars tenuior dissipatur, avolat. Somno & quiete solidorum compages relaxatur, fluidorum motus tum progressivus tum intestinus æquabiliter peragitur, omnium reparatio perficitur. Ira, furor corpus excruciant, vesani amor interdum corporis molemi summopere movet, aliàs hanc inertem tenet, spes, desideria reciprocâ fluidorum & solidorum actionem promovent, mæstitia, timor humorum suffocant circuitum, meditatio diuturnior & perversa nervos ad spasmus ducit, animi torpor & segnities, corporis easdem affectiones trahunt. Excretiones oris, narium, cutis & alvi providæ naturæ beneficio superflua, corpori nocitura amandant; sed haud infrequenter malè-suadâ arte, sanitati essentialia, retinenda absumunt, quod quidem non pauci proprio Marte nares & os picrotici usui irritantes aut evacuationes alias sollicitantes experiantur.

A

Hæc omnia vitæ pabula, rerum non naturalium constituunt classes quarum quævis diversissima, planè opposita continet; attamen his omnibus absque salutari delectu obtemperant homines; hinc morborum cohors quæ sanè non debaccharetur, si unusquisquè pro ut sua postulat constitutio, res non naturales adhiberet.

I I.

TEMPERAMENTUM quodlibet ad vitiosum propendet excessum quem antiquiores intemperiem dixerunt. Ea etenim est fors structura humanæ ut se ipsam destruat; quod ut præcrastinetur quantum hygieinem penes est, cautissimè perpendendum quodnam in quavis constitutione immineat vitium. Hæc in scrutatione Halleri vestigiis non insistendum; præstantissimus Autor (a) accuratè minùs vitæ propriis viribus labantis causas assignat, in medium proferens vitam reciproca solidorum & fluidorum attritione destrui. Adversatur hujus sententiæ, senio confectorum observatio, quæ constat solida & fluida in illis longè crassiora quam in pueris & adultis superesse. Verùm jam propugnatum fuit nostrâ Thesi Physiologicâ, humores in constitutione sanguineâ tenuissimos permeare solida gracilia & maximè pervia. In phlegmaticâ constitutione fluida spissa, malè mixta, seri & pinguedinis molem stagnare intra vasa debilia & laxa. In constitutionibus biliosis & melancholicis sanguinem coagmentari moleculis, crassis, duris, compactis minima per vasa rigida vix ac ne vix quidem meabilem, nervos in iisdem constitutionibus summopere tendi. Porro haud perarduum assignare labe ad quas nituntur supra laudatæ constitutiones simplices. Si quidem in constitutione sanguineâ humorum tenuitas eorumdem dissolutionem minuitur & solidorum fragilitas eorum rupturam portendit, inde hæmorrhagiæ, inflammationes hanc constitutionem non rarò divexant. Fluidorum spissitudo, seri exuperantia, solidorum laxitas obstructions, hydropes in phlegmaticis pertimescendas nunciant. Biliiosi & melancholici ad passionem hypochondriacam, marasmm proclives propter nervorum tensionem, vasorum rigiditatem & fluidorum molecularum crassitiem præjudicantur. In constitutionibus compositis una ex prædictis simplicibus dominium tenet, idcirco ad illam attendendo aliis tamen non contemptis levi operâ patefiet quid mali sit in procinctu.

I I I.

VARIIS constitutionibus impendentes morbos remediorum triplici farragine removere non tentandum; quoniam etenim minitans causa continuò afficiat, remedia continuò usurpanda venirent, idèò vita jugiter amaritudine & doloribus flagraretur, & ex eo quod remedia functiones perturbent, morbus cum sanitate vices alternas ageret. Idcirco nequaquam saluti consulunt qui variis appetitibus impunè servire, & sanitatem tueri existimant, modò ipsis diætæ, purgationes, stomachica, venæ-sectiones in præstò sint. Reapse diætæ post nimias ingurgitationes, à gravissimis morbis helluones arcet, aut ipsis favet ut opiparis epulis voraciùs accumbant; at verò vicissitudinibus tam adversis admodum patitur natura. Stomachica digestionem accelerant, appetitum erigunt, succorum gastricorum secretionem adaugent, at lapsu temporis plethoram accersunt, humorum acrimoniam inducunt. Purgationes & venæ-sectiones quas quidam, indicatione nulla jubente, sed prospicienter, inquirunt, sibi celebrandas amant, non rarò sanitatem summopere lædunt. Ergò medicamina, tanquam anchora sacra, ad vitam contrà morborum procellas fulciendam recondantur, & sanitatis tutamina ex puris fontibus qui amenitate oblectent & utilitate alliciant, hauriantur. Summa hæc bona ex aeris, cibi & potus delectu, motûs & quietis, somni & vigiliæ dispensatione consentaneâ, & retinendorum animi pathematum compressione, excernendorum evacuatione, & turbulendorum custodiâ percipiuntur. His enim cuilibet constitutioni congruè adhibitis, humores tenues nexum intimiorem adipiscuntur, fibræ graciles, crassiores evadent,

(a) Haller.
not. § 111.

fluida spissa attenuabuntur & fluxiliora fient, vasa debilia & laxa robore & elasticitate micabunt, fluidorum moleculæ duræ & crassiores mollescent & minuentur, nervi nimium tensi & solida rigidiora relaxabuntur, digestiones pro votis succedent, omnes functiones facile, constanter, lætè peragentur. Unde inflammationes, hæmorrhagiæ, obstructions, hydropes, hypochondriacæ & hystericæ passionēs, febres intermittentes, putridæ, malignæ prævertentur & omnium ferè morborum adventitiorum caterva procul amovebitur, & consequenter vita sanitate pollens nestoreos annos transcendet.

I V.

RECENSITIS variis imò oppositis dotibus quæ varias constitutiones compingunt, easque varia in pericula mittunt; assignatis rebus sanitati sustentandæ necessariis quæ suâ diversitate corpora diversimodè afficiunt, hanc constitutionem sanam foveri, cui res non naturales adhibentur, quarum energiâ fluidis & solidis impendentia vitia longè submota arcentur, cuinam perspicuum non est? Optata hæc meta non attingetur nisi applicatione therapeutici axiomatis, *contraria contrariis tolluntur*, quod etiam hygieinem decet. Hoc criterio, cuilibet constitutioni consentaneus rerum non naturalium usus præscribendus, quantum arcti Theſeos sinunt cancelli.

Sedem ac domum sub cælo puro, temperato sibi deligant sanguinei, vescantur alimentis crassiori succo donatis, idcirco bovis carnibus, vervecinis, fuis, leporebus, columbis, anatibus & aliis carnibus nigris, vulgò, assatis & elixis indulgeant; ova, legumina, pisces maritimos & fluviatiles, oleo, aceto, sale paucò conditos comedant, olera quæ perspirationem aut diuresim augent, asparagus, v. g. cinaræ capita, apium, chærephyllum, scorzonera, cichorium amarum non frequenter usurpent, fercula ipsis apposita condimentis acribus qualia sunt tubera, fungi, cariophyllum, cappares, cinamomum nux moschata, &c. nunquam ornentur; modicè vinum nunquam merum epotent; corpore moveantur; crebrò reputent; caveant ne algido frigore cohibeatur perspiratio, nec æstuant calore, vigiliis, laboribus immodicis retinenda absumantur. Hoc vitæ genere humores consistentiam quæ nullas dissolutiones pertimeſcendas invehet, adipiscuntur, solida crassitiem quæ humorum impetui absque rupturâ obſistant sibi parant, & ipsi sanguinei minùs petulantes, memoriâ firmiori & iudicio exquisitiori insigniuntur.

Aere sicco gravi & calido afficiantur phlegmatici, cibos moleculis actuosius divites assumant. His dotibus carnes vervecinæ, galli, gallinæ, capones haud faginati, annosæ perdes exornantur, carnes assatas & condimentis acribus, non infrequenter refertas eligant, legumina, olera refrigerantia & incrassantia linquant, ut incalſcentibus & attenuantibus indulgeant, pisces salſos, vino coctos nec oleoſis, nec acidis, verum aromatibus conditos edant; rarè bibant at merum, à prandio coſeam hauriant, liquores ardentis non semper respuant; ambulatione, cursu, venationibus ducantur, litteris assideant; somno & quieti non molliùs cedant; narium & oris secretiones tabaco promoveant. His omnibus humores commoti attenuantur, luxurians serum in auras urgetur, vasorum elasticitas & robur exsurgunt. Undè pinguitudine non laborabunt, illorum viscera glutinosis non intumescunt, serosa colluvies cavitates non distendet, verum robustiores, alacriores phlegmatici corporis & ingenii exercitiis aptiores elucescent.

Levis aer nec æstuant, nec frigidus quem flumina limpida nebulis imprægnant, macilentis, rigidis biliosis & melancholicis faver; vitulinis carnibus, agninis, pullis, coturnicibus, rusticulis, phasianis, silvaticis gallinis junioribus, lautis aviculis decoratâ illorum mensâ reficiuntur, ova forbilia, lacticia, olera refrigerantia,

relaxantia; edulcorantia, in illis optatos effectus præstant; quantum biliosis & melancholicis vina generosa, liquores ardentis, coffea, chocolata, tabacum, condimenta acria nocerent, tantum ipsis largus aquæ paucissimo vino tinctæ potus, cerevisiæ molles, balneationes serum suppeditantes, sanguinis moleculas solventes, vasorum crispaturas tollentes, & acidula condimenta humorum rarefactiones, alkalescentias suffocantia profunt; fabulæ hilares, nugæ, comica, eos è severis meditationibus eximunt; equitatio, vectio in rhedâ, ambulatio, litterarum studia intermitrendo, eisdem ad quietis & somni blanditias alliciunt.

Constitutiones compositæ triplici victûs ratione præscriptâ, modò huic quam ad constitutionem in ipsis dominium tenentem attinet magis indulgeant, optimè se habebunt.

V.

CIRCA res non naturales variis constitutionibus impositæ leges, ipsas tam accuratè, ut non modo solida & liquida resarciant, verum labes ipsis impendentes avertant, ut jam evictum, imò humorum crasim & vasorum indolem immutare pares sint, ita ut una constitutio iis obtemperans in oppositam transfigurari queat, quod si optandum, fiat, sin minus, imminenti constitutioni res idoneæ adhibeantur. At verò nova vitæ norma subito non instituat, etenim sanitatem subvertit victûs immutatio subita, licet ex malis vulgo habitis in bona putata transferit, ut observavit Boerhaavius qui ideò consuetudinem non malè alteram naturam cognominari fatetur. Notò consuetudinis vinculo si quis, non infrequenter contingit, rebus ipsi perniciosis assuetus comperiat; sensum & sine sensu à prava consuetudine deflectat, ut constitutio ipsius supra præscriptis, non secus ac ab ætate & sexu iussis, nec non iis, quæ dum de anni tempestalibus observanda commendat illustrissimus Decanus (a), felicidè obtemperet.

(a) D. J. B. Chomel. quest. Cardin. An hygieine pars medicina utilissima? ann. 1741.

Passim plurimos apud autores, & cæli, & alimentorum potulentorumque, & corporis ac animi exercitiorum mutatione sepius sanitatem valentiorum fieri obvium est. Ast velut spectatores otiosi illorum phænomenon causas haud inquirentes eas silentio habent. Hæc attamen non supra intellectum inter abstrusissima naturæ latitant; illorum dilucidatio fuit ex rebus non naturalibus notis & constitutionum theoriâ; si quidem cæli mutatione magis ac magis viget sanitas, quotiescumque sedem commutans in aerem ejus constitutioni magis faventem prodit; alimentorum & potulentorum mutationes in constitutionibus compositis necessariæ sunt; & in simplicibus salutare, ubi his noxia paulatim deferuntur ut prospicientia comparentur; biliosi præsertim & melancholici in quibus objectorum variatio fibrarum nervearum tensionem minuit, animi & corporis exercitiorum mutatione recreantur, hilares enim evadunt si sepositis litteris, meditationibus, curis, venações, ludos insequantur. Hæc ab autoribus relata, observationes stant eò magis candidæ quò observatores nullâ hypothesen fingendi libidine correpti obmutuerunt, & quoniam sententiæ expositæ admodum consona, conclusionem inconcussam figunt.

Ergò Diversis Temperamentis diversus rerum non naturalium usus.

Proponebat Parisiis CLERIADUS VACHIER, Cluniacensis, Doctor Medicus Monspeliensis, necnon Saluberrimæ Facultatis Medicinæ Parisiensis Baccalaureus, Theses Autor, 1755, A SEXTA AD MERIDIEM.

Typis Viduæ QUILLAU, Universitatis & Facultatis Medicinæ Paris. Typog. 1755.